



地方史书系

海南史传 与 碑传汇纂

下

周伟民
唐玲玲◎编



海南史传与 碑传汇纂

下

周伟民 唐玲玲◎编



知识产权出版社

全国优秀图书出版单位

内容提要

海南典籍文献中,如记述国家大范围史事的像二十五史等正史,记地方史的地方志或笔记等别史,记家族史的家谱等家史里面,都有传记保存,在正史中往往还是主要部分,诸如帝王、宰辅、文武大臣、循吏、儒林、文苑、忠义、孝友、高士、烈女节妇等,都各有传。其中与海南史事有关的人物传记,是为史传。而碑传,即海南人的墓志、传略以及没有刻印流传的私家著述中的传记等,是为碑传。这两者有很好的互补价值。因为史传所记都是人物生平大事,文字也过于严肃;而碑传则是将人物的生平中的典型事件写出,烘托出一个完整的个体,文字也鲜活感人。而史传中常漏写的人物生卒年,碑传中补入。有些在某些方面有成就但史传认为不够档次而缺记,碑传却补入。这样,将史传与碑传合纂在一起,便于读者更全面地把握历史人物。

责任编辑:兰 涛

图书在版编目(CIP)数据

海南史传与碑传汇纂/周伟民,唐玲玲编. —北京:
知识产权出版社,2012.6

ISBN 978-7-5130-1369-7

I. ①海… II. ①周…②唐… III. ①历史人物—传记—海南省
②墓志—汇编—海南省 IV. ①K820.866②K877.45

中国版本图书馆CIP数据核字(2012)第134781号

海南史传与碑传汇纂(下)

HAINAN SHIZHUAN YU BEIZHUAN HUIZUAN

周伟民 唐玲玲 编

出版发行: 知识产权出版社

社 址: 北京市海淀区马甸南村1号

网 址: <http://www.ipph.cn>

发行电话: 010-82000860 转 8101/8102

责编电话: 010-82000860 转 8325

印 刷: 知识产权出版社电子印制中心

开 本: 787mm×1092mm 1/16

版 次: 2013年6月第1版

字 数: 1029千字

ISBN 978-7-5130-1369-7/K·131(10378)

邮 编: 100088

邮 箱: hjb@cnipr.com

传 真: 010-82000860 转 8240

责编邮箱: lantao@cnipr.com

经 销: 新华书店及相关销售网点

印 张: 47

印 次: 2013年6月第1次印刷

定 价: 150.00元(上、下)

出版权专有 侵权必究

如有印装质量问题,本社负责调换。

明 代





徐溥

张廷玉

徐溥，字时用，宜兴人。祖鉴，琼州知府，有惠政。溥，景泰五年进士及第。授编修。宪宗初，擢左庶子，再迁太常卿兼学士。成化十五年拜礼部右侍郎，寻转左，久之改吏部。孝宗嗣位，兼文渊阁大学士，参预机务。旋进礼部尚书。

弘治五年，刘吉罢，溥为首辅，屡加少傅、太子太傅。溥承刘吉恣睢之后，镇以安静，务守成法。与同列刘健、李东阳、谢迁等协心辅治，事有不可，辄共争之。钦天监革职监正李华为昌国公张峦择葬地，中旨复官。溥等言：“即位以来，未尝有内降。幸门一开，末流安底。臣等不敢奉诏。”八年，太皇太后召崇王来朝，溥等与尚书倪岳谏，帝为请乃已。占城奏安南侵扰，帝欲遣大臣往解。溥等言：“外国相侵，有司檄谕之足矣，无劳遣使。万一抗令，则亏损国体，问罪兴师，后患滋大。”于是罢不遣。

是年十二月，诏撰三清乐章。溥等言：“天至尊无对。汉祀五帝，儒者犹非之，况三清乃道家妄说耳。一天之上，安得有三大帝。且以周柱下史李耳当其一，以人鬼列天神，矫诬甚矣。郊祀乐章皆太祖所亲制，今使制为时俗词曲以享神明，褻渎尤甚。臣等诵读儒书，邪说俚曲素所不习，不敢以非道事陛下。国家设文渊阁，命学士居之，诚欲其谟谋政事，讲论经史，培养本原，匡弼阙失，非欲其阿谀顺旨，惟言莫违也。今经筵早休，日讲久旷，异端乘间而入。此皆臣等无状，不足以启圣心，保初政。忧愧之至，无以自容。数月以来，奉中旨处分未当者封还，执奏至再至三。愿陛下曲赐听从，俾臣等竭驽钝，少有裨益，非但乐章一事而已。”奏入，帝嘉纳之。

帝自八年后，视朝渐晏，溥等屡以为言。中官李广以烧炼斋醮宠。十年二月，溥等上疏极论曰：“旧制，内殿日再进奏，事重者不时上闻，又常面召儒臣，咨访政事。今奏事日止一次，朝参之外，不得一望天颜。章奏批答不时断决，或稽留数月，或竟不施行。事多壅滞，有妨政体。经筵进讲，每岁不过数日，正士疏远，邪说得行。近闻有以斋醮修炼之说进者。宋徽宗崇道教，科仪符箓最盛，卒至乘舆播迁。金石之药，性多酷烈。唐宪宗信柳泌以殒身，其祸可鉴。今龙虎山上清宫、神乐观、祖师殿及内府番经厂皆焚毁无余，彼如有灵，何不自保。天厌其秽，亦已明甚。陛下若亲近儒臣，明正道，行仁政，福祥善庆，不召自至，何假妖妄之说哉！自古奸人蛊惑君心者，必以太平无事为言。唐臣李绛有云：“忧先于事，可以无忧。事至而忧，无益于事。”今承平日久，溺于晏安。目前视之，虽若无事，然工役繁兴，科敛百出，士马罢敝，闾阎困穷，愁叹之声上干和气，致荧惑失度，太阳无光，天鸣地震，草木兴妖，四方奏报殆无虚月，将来之患灼然可忧。陛下高居九重，言官皆畏罪缄默。臣等若复不言，谁肯为陛下言者。”帝感其言。

三月甲子，御文华殿，召见溥及刘健、李东阳、谢迁，授以诸司题奏曰：“与先生辈议。”溥等拟旨上，帝应手改定。事端多者，健请出外详阅。帝曰：“盍就此面议。”既

毕，赐茶而退。自成化间，宪宗召对彭时、商辂后，至此始再见，举朝诩为盛事。然终溥在位，亦止此一召而已。

寻以灾异求言，廷臣所上封事，经月不报，而言官论救何鼎忤旨待罪者久，溥等皆以为言。于是悉下诸章，而罢诸言官弗问。溥时年七十，引年求退，不许，诏风雨寒暑免朝参。

十一年，皇太子出阁，加少师兼太子太师，进华盖殿大学士。以日疾乞归。帝眷留，久之乃许，恩赉有加。逾年卒，赠太师，谥文靖。

溥性凝重有度，在内阁十二年，从容辅导。人有过误，辄为掩覆，曰：“天生才甚难，不忍以微瑕弃也。”屡遇大狱及逮系言官，委曲调剂。孝宗仁厚，多纳溥等所言，天下阴受其福。尝曰：“祖宗法度所以惠元元者备矣，患不能守耳。”卒无所更置。性至孝，尝再庐墓。自奉甚薄，好施予。置义田八百亩贍宗族，请籍记于官，以垂永久，帝为复其徭役。

《明史》卷一百八十一《列传》第六十九

潘蕃

张廷玉

潘蕃，字廷芳，崇德人。初冒钟姓，既显始复。成化二年举进士，授刑部主事。历郎中。云南镇守中官钱能为巡抚王恕所劾，诏蕃按，尽得其实。出为安庆知府，改鄢阳。时府治初设，陕、洛流民毕聚。蕃悉心抚循，皆成土著。累迁山东、湖广左右布政使。

弘治九年以右副都御史巡抚四川，兼提督松潘军务。宣布威信，蛮人畏服，单车行松、茂莫敢犯。迁南京兵部右侍郎，就改刑部。

十四年进右都御史，总督两广。帐下士旧不下万人，蕃汰之，才给使令而已。黎寇符南蛇乱海南，聚众数万。蕃令副使胡富调狼土兵讨斩之，平贼巢千二百馀所。论功，进左都御史。已，又平归善剧贼古三仔、唐大鬓等。思恩知府岑濬与田州知府岑猛相仇杀，攻陷田州，猛穷乞援。蕃谕濬罢兵，不从，乃与镇守太监韦经、总兵官伏羌伯毛锐集兵十馀万，分六哨讨之。濬死，传首军门，斩级四千七百，尽平其地。回军讨平南海县丰湖贼褐元祖。捷闻，玺书嘉劳。蕃奏，思恩宜设流官，猛构兵失地，宜降同知，俾还守旧土。兵部尚书刘大夏议，猛世济凶恶，不宜归旧治，请两府皆设流官，而降猛为千户，徙之福建。帝从之。正德改元之正月召为南京刑部尚书。逾年，致仕。

初，蕃去两广，岑猛据田州不肯徙，知府谢湖畏猛悍，亦逗留。事闻，逮湖诏狱。湖委罪蕃及韦经、毛锐，经复委罪于尚书大夏。刘瑾方恶大夏，遂并逮四人。大夏以不从蕃言为罪，而蕃亦坐不能抚猛，俱谪戍肃州。三年九月也。既而瑾从户部郎中庄祿言，遣太监韦霏核广东库藏，奏应解赃罚诸物多朽敝，梧州贮盐利军赏银六十馀万两不以时解。逮问蕃及前总督大夏、前左布政使仁和沈锐等八百九十九人，罚米输边。锐廉介，已迁南京刑部右侍郎，乞休归，至是夺职。瑾诛，蕃以原官致仕。逾六年，卒。锐至嘉

靖初，始复职致仕。

方蕃解官归，无屋，税他人宅居之。与乡人饮，露坐花下，醉则任所之。其风致如此。

《明史》卷一百八十六《列传》第七十四

潘蕃

阮元 陈昌齐

潘蕃，初姓钟，字廷芳，嘉兴崇德县人。从父京师，占籍留守前卫，中顺天乡试，已而登成化二年进士，复姓，授刑部主事。历郎中，四迁至右副都御史，巡抚四川，转南京刑部右侍郎。未几，改南京兵部，又升右都御史，总督两广。岭外镇抚臣故威重，自韩雍开府后，莅其地者，率建牙吹角，列戟拥纛，军门沉沉然，被组练而夹甲帐者几万人，其戈矛子弟纨绔相错，起居护导者无算。蕃量留数人，仅给麾下使令，向相沿自卫者悉遣征发。与诸将大吏约：凡科条如旧，无事更扰，有以密封白事者，一切禁罢之。至其节制特严，一号令出，即大将不敢喘息方面，下稍违约束，必召军正治以法，不少贷。会黎寇符南蛇等肆祸海南，聚众号数万。蕃前已授方略，至是亲统兵逆击，大破之，生获首酋，磔于市。论功，进左都御史。而思恩知府岑濬与思州知府岑猛以叔侄，为土官，争地相仇杀。濬攻陷思州，知府岑猛奔走军门乞援。蕃谕濬罢兵，濬不从，且据地反。蕃会奏请讨，密计其所居道里远近险易，调集两广官军及土目诸兵，分六哨以进。濬大窘，伏诛，馀者杀降殆尽。而丰湖十三徭寇及惠州古三仔、唐大鬓等凭恃犷戾，阻兵肆乱。蕃督率部兵左右掩击，歼古、唐二渠，而馀党尽散。凡五年间，计前后斩获共一万三千有奇，且节缩驿传，省冗费不费。又奏裁其冗官二十七员，请改思州，设流官；升河池县为州，而割归德州，使隶之南宁，以控制海徼。岭表大治。正德改元，蕃与中官忤，乞去，不许，诏拜刑部尚书。而瑾复憾蕃，蕃再乞去，于是命乘传归里。初，岑濬既平，蕃议以思恩改设流官，而岑猛失守府治，则宜降同知。时尚书刘大夏议独相左，乃奏徙猛平海卫，降千户，而思州亦从改革。及蕃去，而猛不行，据思州叛，瑾遂用此为蕃罪，逮蕃及大夏下狱。将论死，姑从减，永戍甘肃。瑾诛，诏复官。归里凡六年，卒。卒之日，属其子曰：“吾贫，不能丧衣，裁被体吾。不拘阴阳，以卜趣避无雨漏下窆可也。”至嘉靖十八年，用御史傅凤翔请，乃赐祭葬于石门乡。先是，蕃从两广军门升尚书，归无宅，税他人宅，居而隘。每与乡人饮，必露坐花下，醉任所之。时有诗曰：“尚书归来无第宅，税地种花兼种鱼。举网打鱼鱼换酒，花前醉倒老尚书。”蕃得诗大笑。及被逮，乡人同游者皆相送，蕃械系拱手就道，观者流涕。《毛西河集》

清·阮元总裁 陈昌齐总纂《道光广东通志·琼州府》

海南出版社 2006年版

丘福

张廷玉

丘福，凤阳人。起卒伍，事成祖藩邸。积年劳，授燕山中护卫千户。燕师起，与朱能、张玉首夺九门。大战真定，突入子城。战白沟河，以劲卒捣中坚。夹河、沧州、灵壁诸大战，皆为军锋。盛庸兵扼淮，战舰数千艘蔽淮岸。福与朱能将数百人，西行二十里，自上流潜济，猝薄南军。庸惊走，尽夺其战舰，军乃得渡。累迁至中军都督同知。

福为人朴讷鸷勇，谋画智计不如玉，敢战深入与能埒。每战胜，诸将争先效虏获，福独后。成祖每叹曰：“丘将军功，我自知之。”即位，大封功臣，第福为首。授奉天靖难推诚宣力武臣、特进荣禄大夫、右柱国、中军都督府左都督，封淇国公，禄二千五百石，与世券。命议诸功臣封赏，每奉命议政，皆首福。

汉王高煦数将兵有功，成祖爱之。福武人，与之善，数劝立为太子。帝犹豫久之，竟立仁宗，以福为太子太师。六年加岁禄千石。寻命与蹇义、金忠等辅导皇长孙。明年七月将大军出塞，至胘胸河，败没。

先是，本雅失里杀使臣郭骥，帝大怒，发兵讨之。命福佩征虏大将军印，充总兵官，武城侯王聪、同安侯火真，为左、右副将，靖安侯王忠、安平侯李远，为左、右参将，以十万骑行。帝虑福轻敌，谕以：“兵事须慎重。自开平以北，即不见寇，宜时时如敌，相机进止，不可执一。一举未捷，俟再举。”已行，又连赐敕，谓军中有言敌易取者，慎勿信之。

福出塞，率千余人先至胘胸河南。遇游骑，击败之，遂渡河。获其尚书一人，饮之酒，问本雅失里所在。尚书言：“闻大兵来，惶恐北走，去此可三十里。”福大喜曰：“当疾驰擒之。”诸将请俟诸军集，侦虚实而后进。福不从。以尚书为乡导，直薄敌营。战二日，每战，敌辄佯败引去，福锐意乘之。李远谏曰：“将军轻信敌间，悬军转斗。敌示弱诱我深入，进必不利，退则惧为所乘，独可结营自固。昼扬旗伐鼓，出奇兵与挑战；夜多燃炬鸣炮，张军势，使彼莫测。俟我军毕至，并力攻之，必捷，否亦可全师而还。始上与将军言何如，而遂忘之乎？”王聪亦力言不可。福皆不听，厉声曰：“违命者斩！”即先驰，麾士卒随行。控马者皆泣下。诸将不得已与俱。俄而敌大至，围之数重，聪战死，福及诸将皆被执遇害，年六十七，一军皆没。败闻，帝震怒，以诸将无足任者，决计亲征。夺福世爵，徙其家海南。

《明史》卷一百四十五列传第三十三



倪士兴

宋席珍

倪士兴，金溪人，洪武（1368～1398）初任本县主簿。才能出众，果断廉明，备悉情弊。邑初建县治，百凡兴作，士兴皆赞划有方。节用爱人，与大尹吴至善皆视民如子者。时有元袭官王廷金邀集王贤保，与黎民起兵。士兴奔走营垒，与义士莫宣宝参酌机宜。后果奏奇捷，功震一时焉。

清·宋席珍：《宣统定安县志》卷四《职官志》

海南出版社 2004年版

程济

张廷玉

程济，朝邑人。有道术。洪武末官岳池教谕。惠帝即位，济上书言，某月日北方兵起。帝谓非所宜言，逮至，将杀之。济大呼曰：“陛下幸囚臣。臣言不验，死未晚。”乃下之狱。已而燕兵起，释之，改官编修。参北征军淮上，败，召还。或曰，徐州之捷，诸将树碑纪功，济一夜往祭，人莫测。后燕王过徐，见碑大怒，取左右椎之。再椎，遽曰：“止，为我录文来。”已，按碑行诛，无得免者，而济名适在椎脱处。然考其实，徐州未尝有捷也。金川门启，济亡去。或曰帝亦为僧出亡，济从之。莫知所终。

河西佣，不知何许人。建文四年冬，披葛衣行乞金城市中。已，至河西为佣于庄浪鲁氏，取直买羊裘，而以故葛衣覆其上，破缕缕不肯弃。力作倦，辄自吟哦，或夜闻其哭声。久之，有京朝官至，识佣，欲与语，走南山避之，或问京朝官，佣何人，官亦不答。在庄浪数年，病且死，呼主人属曰：“我死勿殓。西北风起，火我，勿埋我骨。”鲁家从其言。

补锅匠者，常往来夔州、重庆间，业补锅，凡数年，川中人多识之。一日，于夔州市遇一人，相顾愕然。已，相持哭，共入山岩中，坐语竟日。复相持哭，别去。其人即冯翁也。翁在夔以章句授童子，给衣食，能为古诗。诗后题马二子，或马公，或塞马先生。后二人皆不知所终。

又会稽有二隐者：一云门僧，一若耶溪樵。僧每泛舟赋诗，归即焚之。樵每于溪沙上以荻画字，已，辄乱其沙。人有疑之者，从后抱持观之，则皆孤臣去国之词也。

时又有玉山樵者，居金华之东山，麻衣戴笠，终身不易。尝为王姓者题诗曰“宗人”，故疑其王姓云。雪庵和尚，人疑其为叶希贤，见练子宁传。

其后数十年，松阳王诏游治平寺，于转轮藏上得书一卷，载建文亡臣二十餘人事迹，楮墨断烂，可识者仅九人。梁田玉、梁良玉、梁良用、梁中节皆定海人，同族，同仕于朝。田玉，官郎中，京师破，去为僧。良玉，官中书舍人，变姓名，走海南，鬻书以老。



良用为舟师，死于水。中节好老子、太玄经，为道士。何申、宋和、郭节，俱不知何许人，同官中书。申使蜀，至峡口闻变，呕血，疽发背死。和及节挟卜筮书走异域，客死。何洲，海州人。不知何官，亦去为卜者，客死。郭良，官籍俱无考，与梁中节相约弃官为道士。余十一人并失其姓名。缙云郑僖纪其事为忠贤奇秘录，传于世。

及万历时，江南又有致身录，云得之茅山道书中。建文时，侍书吴江史仲彬所述，纪帝出亡后事甚具。仲彬、程济、叶希贤、牛景先皆从亡之臣。又有廖平、金焦诸姓名，而雪庵和尚、补锅匠等，具有姓名、官爵。一时士大夫皆信之。给事中欧阳调律上其书于朝，欲为请谥立祠。然考仲彬实未尝为侍书，录盖晚出，附会不足信。

赞曰：“靖难”之役，朝臣多捐躯殉国。若王艮以下诸人之从容就节，非大义素明者不能也。高巍一介布衣，慷慨上书，请归藩服；其持论甚伟，又能超然远引，晦迹自全，可称奇士。若夫行遁诸贤，虽其姓字杂出于诸家传记，未足征信，而忠义奇节，人多乐道之者。传曰：“与其过而去之，宁过而存之。”亦足以扶植纲常，使懦夫有立志也。

《明史》卷一百四十三《列传》第三十一

张氏

金光祖

张氏，生员孙广学妻。弘治辛酉（1501），同夫收获郭外，时符蚰蛇乱，黎贼散出，夫妇俱被执归峒。贼欲置张他所，张正色曰：“即死，吾夫归同穴，何他往耶！”贼怒，出广学之，张坚抱夫号哭，骂贼不绝口，俱被害。

按：“夫归”是原文，应作“夫妇”。

清·金光祖：《康熙广东通志·琼州府》卷二十
海南出版社 2006年版

林棧

李钟岳

林棧，少失怙恃，性敏嗜学，日记数千言；制行醇谨，睦宗族，敦友谊。督学易嘉奖优行，膺岁荐，不仕。素性义侠，而饶武力。值黎寇内讧，人劝避之。曰：我恨不灭此而朝食，奈何避耶？遂率众进攻，能敢辟易；俄中流矢，归，卒。事闻，督抚礼旌其门曰：“高尚英风”。祀孝义祠。（《旧志》载《孝义》）

民国·李钟岳：《民国文昌县志》卷十《人物志》
海南出版社 2003年版



刘仕𧈧

张廷玉

刘仕𧈧，字伯贞，安福人。父闰，元末隐居不仕。仕𧈧少受父学。红巾贼乱，掠其乡，母张氏率群妇女沉茨潭死。贼械仕𧈧，久之得释。洪武初，以供役为安福丞张禧所辱，仕𧈧愤，益力学。

十五年应“贤良”举，对策称旨，授广东按察司佥事，分司琼州。琼俗善蛊。上官至，辄致所产珍货为贄。受则喜，不受则惧，按治蛊杀之。仕琼者多为所污。仕𧈧廉且惠，轻徭理枉，大得民和。

虽却其贄，夷人不忍害也。辱仕𧈧者张禧，适调丞琼山，以属吏谒，大惭怖。仕𧈧待之与他吏等。未几，朝议省佥事官，例降东莞河泊使。渡河遇风，殁于水。同僚张仕祥葬之鸦矶。

后有王溥者，桂林人。洪武末为广东参政，亦以廉名。其弟自家来省，属吏与同舟，赠以布袍。溥命还之，曰：“一衣虽微，不可不慎，此污行辱身之渐也。”粮运由海道多漂没。溥至庾岭，相度形势，命有司凿石填堑，修治桥梁，易以车运。

民甚便之。居官数年，笥无重衣，庖无兼饌。以诬逮下诏狱，僚属馈赆皆不受，曰：“吾岂以患难易其心哉！”事白得归，卒。

时有徐均者，阳春主簿也。地僻，土豪得盘踞为奸。邑长至，辄饵以厚赂，从而把持之。均至，吏白应往视莫大老。莫大老者，洞主也。均曰：“此非王民邪，不来且诛。”出双剑示之。大老恐，入谒。均廉得其不法事，系之狱。诘朝，以两瓜及安石榴数枚为馈，皆黄金美珠也。均不视，械送府。府官受赇纵之归，复致前馈。均怒，欲捕治之，而府檄调均摄阳江，阳江大治。以忧去官。

《明史》卷一百四十《列传》第二十八

刘仕𧈧

阮元 陈昌齐

刘仕𧈧，字伯贞，安福人。元末，红巾贼乱，掠其乡，母张氏率群妇女沉茨潭死。贼械仕𧈧，久之，得释。洪武初，以供役为安福丞张禧所辱，仕𧈧益愤力学。十五年，应贤良举，对策称旨，授广东按察司佥事，分司琼州。琼俗善蛊，上官至，辄致所产珍货为贄，受则喜，不受则惧，按治蛊杀之，仕琼者多为所污。仕𧈧廉且惠，轻徭理枉，大得民和，虽却其贄，夷人不忍害也。辱仕𧈧者张禧适调丞琼山，以属吏谒，大惭怖，仕𧈧待之与他吏等。未几，朝议省佥事官，例降东莞河泊使。渡河遇风，殁于水，同僚张仕祥葬之鸦矶。《明史·本传》

清·阮元总裁 陈昌齐总纂：《道光广东通志》

海南出版社

符田昭

明 张岳崧

符田昭，儋州黎人，七方峒首。勇略兼人。时海寇为患，率兵御之，斩首数级。值贼兵一伙自他处突至，前后犄角，田昭矢尽，力穷遂死。州守张邦谟，乡先生唐维各有谏文。（《牛志》）

《明府志》卷三十五，人物志，忠义，明。

陈氏

明 张岳崧

陈氏，百户荣长女，赘本卫前所千户舍人温澜为婿。时符南蛇乱，陈与三子并一女年十三俱被执。陈度不免，厉声骂曰：“我名家妇，岂受犬彘污哉？”夺贼刀先杀其女，乃自刎。

清·明 张岳崧纂：《道光琼州府志》卷三十七《人物志》

海南出版社 2006 年版

铁铉

张廷玉

铁铉，邓人。洪武中，由国子生授礼科给事中，调都督府断事。尝谏疑狱，立白。太祖喜，字之曰鼎石。

建文初，为山东参政。李景隆之北伐也，铉督饷无乏。景隆兵败白沟河，单骑走德州，城戍皆望风溃。铉与参军高巍感奋涕泣，自临邑趋济南，偕盛庸、宋参军等誓以死守。燕兵攻德州，景隆走依铉。德州陷，燕兵收其储蓄百馀万，势益张，遂攻济南。景隆复大败，南奔。铉与庸等乘城守御。燕兵堤水灌城，筑长围，昼夜攻击。铉以计焚其攻具，间出兵奋击。又遣千人出城诈降。燕王大喜，军中皆欢呼。铉伏壮士城上，候王入，下铁板击之，别设伏断桥。既而失约，王未入城，板骤下，王惊走。伏发，桥仓卒不可断，王鞭马驰去。愤甚，百计进攻。凡三阅月，卒固守不能下。当是时，平安统兵



二十万，将复德州，以绝燕饷道。燕王惧，解围北归。

燕王自起兵以来，攻真定二日不下，即舍去。独以得济南断南北道，即画疆守，金陵不难图。故乘大破景隆之锐，尽力以攻，期于必拔，而竟为铉等所挫。帝闻大悦，遣官慰劳，赐金币，封其三世。铉入谢，赐宴。凡所建白皆采纳。擢山东布政使，寻进兵部尚书。以盛庸代景隆为平燕将军，命铉参其军务。是年冬，庸大败燕王于东昌，斩其大将张玉。燕王奔还北平。自燕兵犯顺，南北日寻干戈，而王师克捷，未有如东昌者。自是燕兵南下由徐、沛，不敢复道山东。

比燕兵渐逼，帝命辽东总兵官杨文将所部十万与铉合，绝燕后。文师至直沽，为燕将宋贵等所败，无一至济南者。四年四月，燕军南缀王师于小河，铉与诸将时有斩获。连战至灵璧，平安等师溃被擒。既而庸亦败绩。燕兵渡江，铉屯淮上，兵亦溃。

燕王即皇帝位，执之至，反背坐廷中漫骂。令其一回顾，终不可，遂磔于市，年三十七。子福安，戍河池。父仲名，年八十三，母薛，并安置海南。

《明史》卷一百四十二《列传》第三十

薛祥

张廷玉

薛祥，字彦祥，无为人。从俞通海来归，渡江为水寨管军镇抚，数从征有功。洪武元年转漕河南。夜半抵蔡河，贼骤至。祥不为动，好语谕散之。帝闻大喜。以方用兵，供亿艰，授京畿都漕运使，分司淮安。浚河筑堤，自扬达济数百里，徭役均平，民无怨言。有劳者立奏，授以官。元都下，官民南迁，道经淮安，祥多方存恤。山阳、海州民乱，驸马都尉黄琛捕治，诬误甚众。祥会鞠，无验者悉原之。治淮八年，民相劝为善。及考满还京，皆焚香祝其再来，或肖像祀之。

八年授工部尚书。时造凤阳宫殿。帝坐殿中，若有人持兵斗殿脊者。太师李善长奏诸工匠用厌镇法，帝将尽杀之。祥为分别交替不在工者，并铁石匠皆不预，活者千数。营谨身殿，有司列中匠为上匠，帝怒其罔，命弃市。祥在侧争曰：“奏对不实，竟杀人，恐非法。”得旨用腐刑。祥复徐奏曰：“腐，废人矣，莫若杖而使工。”帝可之。明年改天下行省为承宣布政司。以北平重地，特授祥，三年治行称第一。为胡惟庸所恶，坐营建扰民，谪知嘉兴府。惟庸诛，复召为工部尚书。帝曰：“谗臣害汝，何不言？”对曰：“臣不知也。”明年坐累杖死，天下哀之。子四人，谪琼州，遂为琼山人。

孙远，正统七年进士，景泰时，官户部郎中。天顺元年擢本部右侍郎，改工部。奉诏塞开封决河。还，仍改户部。成化初，督两广军饷，位至南京兵部尚书，以忤汪直免官。

《明史》卷一百三十八《列传》第二十六



王文灿

于煌

王文灿，端赵人，邑痒生。少负能略，喜于战斗。正德（1506 - 1521）末，以公忿缘事议遣。嘉靖（1522 - 1566）初，赴阙讼冤者再，竟获减释。虽备尝霜雪，而浩气犹存。从征南山叛黎，战死于阵，官军歎息，迄今里人犹立庙尸祝之。

清·于煌：《乾隆会同县志》卷八《人物志》

海南出版社 2006 年版

柳珣 钱大有 李元爵

朱为潮

柳珣，安远候升五世孙，袭祖爵。嘉靖二十年（1541），奉命统兵征黎，擒斩五千，诛其酋三十人，加少保，卒赠太保，谥武襄。《明史稿》同时有广南卫指挥钱大有、李元爵俱从征岭脚黎有功。（《萧府志》）

民国·朱为潮：《民国琼山县志》卷二十三《官师志》

海南出版社 2004 年版

按：《阮通志》卷二百五十四据《明史·本传》作“柳景，怀宁人，升会孙，景子文，文子珣，三世皆镇两广，有平蛮功，珣又以讨琼州黎贼功，晋少保。”此文较详，故用之。

武鸾 董廷玉 刘经 戚振 刘海

明谊 张岳崧

武鸾，广西人，琼州参将。嘉靖十九年（1540）崖、陵各县黎岐蠢动，鸾奉檄同参将董廷玉、刘经北、山屯指挥戚振。广州卫指挥刘海等领兵分哨，剿捕斩获无算。捷闻，各升俸一级，赏赉有差。

清·明谊修 张岳崧纂：《道光琼州府志》卷三十一《官师志》

海南出版社 2006 年版



李叔正

张廷玉

李叔正，字克正，初名宗颐，靖安人。年十二能诗，长益淹博。时江西有十才子，叔正其一也。以荐授国子学正。洪武初，告归。

未几，复以荐为学正，迁渭南丞。同州蒲城人争地界，累年不决。行省以委叔正，单骑至，剖数语立决。渭南岁输粮二万，豪右与猾吏为奸，田无定额。叔正履亩丈量。立法精密，诸弊尽剔。

迁兴化知县。寻召为礼部员外郎，以年老乞归，不许，改国子助教，于是叔正三至太学矣。帝方锐意文治，于国学人材尤加意。然诸生多贵胄，不率教。叔正严立规条，旦夕端坐，督课无倦色。朝论贤之。

擢监察御史，奉命巡岭表。琼州府史讦其守踞公座签表文，叔正鞫之，守得白，抵吏罪。太祖嘉之曰：“人言老御史懦，乃明断如是耶。”累官礼部侍郎。十四年进尚书，卒于官。叔正妻夏氏，陈友谅陷南昌时，投井死。叔正感其义，终身不复娶。

《明史》卷一百三十七《列传》第二十五

吴伯宗

张廷玉

吴伯宗，名祐，以字行，金溪人。洪武四年，廷试第一。时开科之始，帝亲制策问。得伯宗甚喜，赐冠带袍笏，授礼部员外郎，与修大明日历。胡惟庸用事，欲人附己，伯宗不为屈。惟庸衔之，坐事谪居凤阳。上书论时政，因言惟庸专恣不法，不宜独任，久之必为国患。辞甚恺切。帝得奏召还，赐衣钞。奉使安南，称旨。除国子助教，命进讲东宫，首陈正心诚意之说。改翰林典籍。帝制十题命赋，援笔立就，词旨雅洁。赐织金锦衣。除太常司丞，辞。改国子司业，又辞。忤旨，贬金县教谕。未至，诏还为翰林检讨。十五年进武英殿大学士。明年冬，坐弟仲实为三河知县荐举不实，词连伯宗，降检讨。

伯宗为人温厚，然内刚，不苟嬖阿，故屡蹶。逾年，卒于官。伯宗成进士，考试官则宋濂、鲍恂也。

恂，字仲孚，崇德人。受易于临川吴澄，好古力行，著大易传义，学者称之。元至正中，以荐授温州路学正。寻召入翰林，不就。洪武四年，初科举取士，召为同考官。试已，辞去。十五年与吉安余詮、高邮张长年、登州张绅，皆以明经老成为礼部主事刘庸所荐，召至京。恂年八十馀，长年、詮亦皆逾七十矣，赐坐顾问。翌日并命为文华殿大学士，皆以老疾固辞，遂放还。绅后至，以为鄞县教谕，寻召为右佥都御史，终浙江左布政使。其明年以耆儒征者，曰全思诚，字希贤，上海人，亦授文华殿大学士。又明

年请老，赐敕致仕。

伯宗之使安南也，以名德为交人所重。其后，襄阳任亨泰亦举洪武二十一年进士第一，以礼部尚书使安南，交人以为荣。前后使安南者，并称吴、任云。

亨泰为礼部尚书时，日照民江伯儿以母病杀其三岁子祀岱岳。有司以闻。帝怒其灭绝伦理，杖百，戍海南，因命亨泰定旌表孝行事例。亨泰议曰：“人子事亲，居则致其敬，养则致其乐，有疾则谨其医药。卧冰割股，事非恒经。割股不已，至于割肝，割肝不已，至于杀子，违道伤生，莫此为甚。堕宗绝祀，尤不孝之大者，宜严行戒谕。倘愚昧无知，亦听其所为，不在旌表之例。”诏曰：“可。”明年，议秦王丧礼，因定凡世子袭爵之礼。会讨龙州赵宗寿，命偕御史严震直使安南，谕以谨边方，无纳逋逃。时帝以安南篡弑，绝其贡使。至是闻诏使至，震恐。亨泰为书，述朝廷用并之故以安慰之，交人大悦。使还，以私市蛮人为仆，降御史。未几，思明土官与安南争界，词复连亨泰，坐免官。

《明史》卷一百三十七《列传》第二十五

顾贤 吴树 张淙

明 谊 张岳崧

顾贤，雷州卫指挥。吴树，惠州卫指挥。张淙，守备。二十八年，从征崖、感黎。《萧府志》

按：二十八年是嘉靖二十八年。

清·明 谊修 张岳崧纂：《道光琼州府志》卷三十一《官师志》

海南出版社 2006 年版

朱亮祖

张廷玉

朱亮祖，六安人。元授义兵元帅。太祖克宁国，擒亮祖，喜其勇悍，赐金币，仍旧官。居数月，叛归于元，数与我兵战，为所获者六千余人，遂入宣城据之。太祖方取建康，未暇讨也。已，遣徐达等围之。亮祖突围战，常遇春被创而还，诸将莫敢前。太祖亲往督战，获之，缚以见。问曰：“尔将何如？”对曰：“生则尽力，死则死耳！”太祖壮而释之。累功授枢密院判。从下南昌、九江，战鄱阳湖，下武昌。进广信卫指挥使。李文忠破李伯昇于新城，亮祖乘胜燔其营落数十，获同佥元帅等六百余人、军士三千、马八百匹，辎重铠甲无算。伯昇仅以数骑遁。太祖嘉其功，赐赉甚厚。胡深请会兵攻陈友定，亮祖由铅山进取浦城，克崇安、建阳，功最多。会攻桐庐，围余杭。迁浙江行省参政，副李文忠守杭州。帅马步舟师数万讨方国瑛，下天台，进攻台州。国瑛出走，追至黄岩，降其守将哈儿鲁，



徇下仙居诸县。进兵温州。方明善拒战，击败之，克其城。徇下瑞安，复败明善于盘屿，追至楚门。国瑛及明善诣军降。

洪武元年副征南将军廖永忠由海道取广东。何真降，悉定其地。进取广西，克梧州。元尚书普贤帖木儿战死，遂定郁林、浔、贵诸郡。与平章杨璟会师攻克靖江。同廖永忠克南宁、象州。广西平。班师，太子率百官迎劳龙湾。三年封永嘉侯，食禄千五百石，予世券。四年伐蜀。帝以诸将久无功，命亮祖为征虏右副将军。济师至蜀，而明昇已降。徇下未附州县。师还，以擅杀军校不预赏。八年同傅友德镇北平。还，又同李善长督理屯田，巡海道。十二年出镇广东。

亮祖勇悍善战而不知学，所为多不法，番禺知县道同以闻。亮祖诬奏同，同死，事见同传。帝寻悟，明年九月召亮祖至，与其子府军卫指挥使暹俱鞭死。御制圻志，仍以侯礼葬。二十三年追论亮祖胡惟庸党，次子昱亦坐诛。

《明史》卷一百三十二《列传》第二十

程昶 程场

明 张岳崧

程昶、程场，俱都指挥，未详籍贯。宣德元年（1426），督征定安各县黎寇有功。又天顺四年有部指挥安福，亦忘籍贯，尝平土城即宣有功《阮通志》。

按：《明府志》卷三十一，官师志四，武功，明，引用。

符福兴

明 张岳崧

符福兴，洪武（1368—1398）间，抚陵水黎有功，世袭千户。林彬，永乐（1403—1424）间抚黎有功，世袭士官典史，子袭兼职。

《明府志》卷二十八，选举志十，荫袭，文昌县明。

薛显

张廷玉

薛显，萧人。赵均用据徐州，以显为元帅，守泗州。均用死，以泗州来降，授亲军指挥，从征伐。南昌平，命显从大都督朱文正守之。陈友谅寇南昌，显守章江、新城二